

光緒撫寧縣志

撫甯縣志卷十四

鄉型下

明

楊珍省祭官母早逝事父惟謹侍食侍寢晝夜無怠內外咸以孝子呼之父疾篤醫藥無效珍嘗其便泄以味甘知不起遂治後事如禮及葬廬於墓側負土成墳二年乃歸詔立坊以旌其門

金鏞縣生員父禧早逝母高氏守節撫鏞慄然有松柏操鏞性孝負米採薪勤於供養母偶病卽憂形於色焚香告天願以身代進食必先嘗其寒熱由選貢累官至光

祿寺署正以母老乞歸清操儉德有古人風

楊有成縣生員八歲喪父哀毀如成人母有疾湯藥親供  
卒之日水漿不入口者數日及葬結廬於側日三次哭  
奠寒暑不輟時邊報甚急人多逃匿有成不爲動墓舊  
有枯松逾歲復活禽鳥恆棲噪其上人皆以爲純孝所  
致詔旌其門

袁卉素敦孝行母早逝及父沒廬墓側三年蛇馴尊次地  
涌甘泉世稱孝感按院書匾以旌之

孫國賢母沒廬墓三年詔旌其門

翟昊本衛人尙書鵬父也性溫厚與物恂恂嘗受侮而不

報若怯者然及見義輒勇爲濟困扶危人有辜恩負貸者亦無愠色苛辭以相較行誼卓犖人祀鄉賢

許敬邑宣北人景泰三年大饑出粟八百石賑濟之詔旌其門

王信本衛人進士印祥之祖成化七年大饑出糧米八百石賑濟之詔旌其門

徐傑生平積德以寬忍爲務養孤姪產金均分橫逆不校邦大夫高其行誼給授冠帶三子九孫無白丁

王天相樂善好施不遺餘力嘗捐穀以濟軍本縣扁旌口耕讀樂業泉石幽貞

馮守業捐資活貧出粟救荒子孫顯達人以爲好善之報  
楊念治家嚴肅一門雍睦七世同居本縣旌之

郭純學樂善好施神宗時歲荒捐米賑濟本縣旌其門  
黃應科性喜施舍族人黃大領家貧轉徙失業科招之回  
給田一頃二十畝養之

鍾鉞孝友倜儻有大節扁旌曰行孚月旦

高鑑素業農質樸未學而好敦善行事親孝撫兩兄孤子  
周貧濟乏鄉人服其長厚

王一介性寬和恤難周急鄉里稱長者

國朝

徐從新武庠生母性嚴從新恪遵母訓任俠好施人服其義

徐進孝農人也父患心痛幾死貧不能延醫禱神許愿疾愈愿未償疾復作孝割胸前肉如掌禱還神愿疾竟瘳以肉挂樹上數月不腐鴈雀亦不食人謂純孝之感

邑人王運恆紀徐孝子詩十章云兔峯之西鄉曰翟田  
涪龐萃止孝子生焉  
稱其實父病沈篤藥石無人傍程號泣求援於神哀哀  
祝愿刳豕封羊父病復作刳腹以償捧肉薦神神心亦  
痛監茲血誠拯其父病肉懸樹間感孚物類弗啜弗餐  
鷹饑蠅穢不敗不腐數月如新天存懿物以示世人載  
拜敬書一字一淚高山景行俯仰含愧至孝流芳編中  
數見以身代牲古今獨擅負哉絕德邑秉光垂不慚銀  
管有道之碑

劉從性母李年八十餘病臥不起性赴關帝廟剗股禱神  
爲母借壽病尋愈

趙名元生員母卒廬墓衰經不去身晨昏哭奠三年如一  
日本縣給扁督學上其事予旌

趙夔龍兄弟同居樂舉善緣年登八十子孫多遊庠序鄉  
人重之

楊重望武庠生賦性和平樂善好施義方教子品隆鄉介  
惠文俊由吏員任海甯大使清慎老練上民德之居鄉好  
禮巡撫扁旌曰雅操高風百年八十四

單擇中武庠生持身醅謹教子嚴肅冬月恆舍薪米以濟

貧子孫多遊庠序

徐應虎性耿介尙義樂施本縣扁曰一鄉善士山石道呂  
扁曰德壽軼倫

張敬銘尙義急公孝友信果壽百耄耄本縣扁曰德副與  
情

陳王基武庠生耕讀教子修建廟宇不出入公門

楊啟祥武庠生性樸直行敦謹力田課子足跡不入公門  
夏正名臺頭營人天性孝友總角時卽知懷物遺母聞他  
人喪親輒爲涕泣家貧不能讀書隨父國祥營家計曲  
盡菽水歡父歿哀毀骨立母有疾焚香默祝願減已算



以益母壽及歿廬墓三年時以孝稱卒祀忠孝祠子生  
員德厚亦廬墓三年

惠爾龍下莊人生員惠愉子幼失怙以貧廢學母俞氏病  
求以身代延壽八十四歲至乾隆九年病故爾龍悲思  
不已廬墓三年郡縣上其事觀察方公覆加確察令本  
縣自行褒獎

趙景明興盛峪人年九十七弟光明九十四冊明九十一  
康熙甲子子邑侯趙端題同胞三老四字贈之每下鄉必  
與款話同堂五世慶集曾元景明壽百有十歲餘皆臻  
百歲扁至今存

徐麟祥歲貢生年七十居父喪依然孺慕名其齋曰爲善最樂又刻忍讓敬恕於堂人皆稱爲有道邑侯張公奎祥贈純嘏是常扁八十初度邑侯莊公學愈贈德厚天全扁郡守梁公錫蕃贈盛朝人瑞扁

單槐字卜黃乾隆壬申科舉人選廣文親老不仕讀書樂善承先人敦睦遺訓丁酉春創立宗祠規模宏敞置祭田千畝市廛數十間歲租所入以供祭祀設義塾延師教族子弟冠婚喪葬事有依鰥寡孤獨月有養刊立規條報官存案至今繼繼繩繩子孫食其德云

張元會榆關人監生樂善好施族有貧不能婚葬者恆周

恤之冬月乞人必與之熱粥晚約鄉老三四人作真率會訂期五日相與話桑麻訓後進乾隆五十七年卒壽九十七五世同堂

王毓德字遂明歲貢生天性孝愛母歿欲廬墓以父在不果父歿乃伸其志年七十餘墓祭必哀與人言輒以孝相勉晚得孝經衍義一書昕夕讀之咸豐己未學憲萬青黎旌以庸行者儒額

王舉深河人天性慈厚鄉里以善人稱之道光十八年邑侯許夢蘭表其門

李玉牛家店人自明萬曆三十六年李肇端遞傳至玉九

世同居每世率以一人主家政第五世止二人曰生芝  
興芝生芝無子興芝生晏文以文爲生芝之後文後無子  
晏生逢太逢春逢永以逢春嗣文逢太生瑞逢春生玉  
璽瑩珂逢永生環琢而瑞早卒妻惠氏有賢能玉持家  
政與弟璽等以瑞妻爲本宗長嫂使主內治凡事必參  
議而行食指五十餘人內外整肅郡守游公賜額曰李  
氏義門縣令張公賜額曰風希百忍

張廷璐字寶臣東新寨人監生居家孝友五世同堂男婦  
五十餘人格守教訓壽八十餘卒至今子孫奉行殆追  
百忍遺風焉

李永貞邠各莊人貧爲人傭三十二歲妻亡不娶恐不能  
孝母也無子亦不繼晨夕自炊入市必買時物遺母母  
壽八十四而終其姊五十餘家貧無子將改適永貞復  
爲養生送死不遺餘力其至性過人求之於藜藿家益  
亦難矣

王起發黑石堡人樂善好施嘗捐資修補界嶺口外十八  
盤嶺道前後十里行人便之道旁有碑記其事

張近光字訓齋榆關河西人性孝友樂善好學年二十八補博  
士弟子員少隴任山左父歿後喪祭遵古禮伯叔中有困  
乏者讓產以居之置族田好任卹鄉鄰有惡行相戒曰

胡令先生知也年逾八旬能作擘窠書尤湛經史道光  
庚戌舉孝廉方正力辭乃止鄉間碩望以先生爲最云  
熊懋顯縣北田莊人後遷居口外建昌縣父瑚早喪母張  
氏懋顯事之最孝母七旬卒廬墓三年建昌犇牛營巡  
檢張曾旌其門時道光二十三年也

陳福田字禦所千總銜生平好施與盡然諾以孝弟力田  
世其家道光十二年歲大饑米價昂貴民食爲艱慨然  
以施飯濟貧爲已任自正月初五日起至十二月二十  
五日止按日捐米五六升午正煮熟以待村內外之貧  
苦者鄉人德之以後無論豐歉遂沿以爲例道光二十

五年縣令李公旌其門曰樂善不倦咸豐九年福田卒  
子庭桂謹守遺訓遵行不怠迄今已四十餘年

張孝子起鳳牛蹄寨人父正母王氏其母遺腹三月而父  
卒孝子生而岐嶷賦性仁孝年甫五六歲卽知博親歡  
凡嬉戲之事無不惟母是從每一出入必稟命遇美食  
必母先嘗而後敢食家素貧賴母紡織以生一日母因  
勞成疾孝子年方冠見母病不起日夜悲號母病昏米  
漿不入口者數日孝子侍左右衣不解帶者亦數日及  
母病少間孝子問母所欲食母伏枕良久應曰要食人  
肉蓋以子無財難以爲悅也孝子爽然若失遂唯唯而

退潛往其村三官廟叩禱於神曰他人之肉不可得而食惟吾之肉可得而食之食之而疾愈則吾可以生食之而疾不愈則吾亦不能獨生祝畢挺然用利刃割左股一櫛懷歸烹以進母食之果愈孝子亦無恙此事人不知也母亦不知也厥後事聞乾隆丙子邑侯單烺造其里表其門曰割股療親至今里人尙播爲美談

俞泌字艸臣嘉慶丁卯科亞元任定興教諭品行端方學問淵博解組後猶家居授徒誨人不倦道光戊戌舉鄉飲大賓壽八十六而終

曹震廬王莊人性正直講明孝友善治家有公藝風一門



和睦郡守王公旌其門

金錫祿字荷菴樊葛莊人 恩貢生由 國史館謄錄議敘選授河間阜城縣教諭時值土匪竄擾協同團練守城有功加六品銜性篤厚端方睦鄉好義授徒於家三十餘年成材甚衆凡貧而有志讀書者從不受其修脯復資助之以成其學里中有烈婦馮常氏嘗出資代爲請旌以勵風化年老致仕教子課孫樂善不倦卒年七十七

單德林東河南莊人幼失怙事母最孝家赤貧甘旨無缺因無以爲養每歲服賈遼東同治四年冬關外馬賊竄

御書紹書香扁紅藥翻階春鍊句青藜映案夜修書聯賜之  
徐升聞歲貢生康熙戊寅裕親王祭長白駐其家傳見命  
坐講書論文獎以鴻才雅望扁額

邑人王立柱徐氏世譜記云光緒丙子年今邑侯張公  
續修撫甯縣志因得觀徐氏世譜譜作於前明崇禎五  
年續修於康熙五年又修於康熙四十一年又修於乾  
隆十八年爲卷凡六世系第一總錄第二闕第三神主  
第四墳墓第五行述第六末附宗法雜著二卷第五次  
續修之時邑侯袁公芳杏爲序以冠其首徐氏爲驪城  
著姓據譜其始祖自明洪武二十五年來居至於乾隆  
年修譜之時中間掇泮芹者六十八人食廩餼者九人  
與賢書者三人登仕版者十三人雖無巍科顯仕而四  
百餘年未嘗有一代絕無者其亦可謂盛矣袁公之序  
有曰源遠者流長栽固者培厚由今觀之不信然歟譜  
經五修而其文皆潔淨簡嚴如出一手世系篇內徐廷  
琚五難堪詞一首徐阜年抱憾終天記一首雜著篇內  
徐廷瑋廩糧助祭說一首尤爲卓絕謹記之以俟採風

者擇焉

吳蔭松字景嵐一字聯崖邑西南墳垞人也生而穎異制舉文得其外王父馮龍會孝廉之傳與其外弟馮士灝孝廉齊名由拔貢生中乾隆丙午科鄉舉任東光縣教諭嘉慶壬戌科成進士任河南沈邱襄城等縣知縣性豪放不能與世俛仰在襄城時郡守某同年友也知其善楷法以書壽屏召之蔭松見札輒然曰書屏可加以札則役我矣吾不能爲人役終不往某後竟以他事中乞改教職遂請告歸蔭松於學無所不窺而尤長於詩賦及駢體文時河間紀文達公以鴻才碩學領袖清流

蔭松以科名出公門下受知最深居公第甚久文達公  
晚年著作多俾爲捉刀今所傳遺集爲後人所蒐採其  
間蓋有代作之文然已不可辨矣家故饒於貲以仕而  
貧然猶踰中人產旣以不合上官歸益縱酒高會爲樂  
不足則割膏腴之產無所惜座客常滿顧於文獨斷斷  
寡合學者以龍門太峻恆疑畏而不敢前王廉訪瑞徵  
未第時蔭松見其文遽折柬招欲一見王造門適值其  
飲酒高宴豪貴滿座遽投箸起降階出迎及肅入則一  
韋布年少也客相顧動色已而諸客盡散獨留王論文  
一室至十晝夜不倦謂子文必且榮世王因受業於其

門時其從孫際昇亦有聲藝序間蔭松則但以乙榜許之嗣際昇由拔貢得雋屢躋春闈卒以礪州教諭終如蔭松言是則人倫之鑒實有大過人者年八十餘卒於家貧不能葬其婿單光裕部郎助之資始克勦事平生吟詠最富沒後多散佚

宋赫字（圖）因所居名野村在邑之東北故自號東野人皆稱東野先生窮而工詩中乾隆戊子科舉人性耿介不與俗諧久困名場以舌耕爲業著有東野詩草長洲少宗伯陶鳬菴先生輯畿輔詩傳登諸首選嘗稱其詩樸老蒼秀爲永平獨步

以上文學

明

高德洪武初從征果立戰功除授副千戶十四年奉調征雲南金齒衛等處所至奏績十五年八月力戰於阿白寨死之及雲南平贈明威將軍僉指揮使司事世襲指

揮僉事

案雲南通志作大白寨

周建本衛指揮僉事成化十六年管界嶺駐操營事三月寇入境參將王宣督令截殺至白石店奪被掠人畜輜重回至楸木嶺遇伏力戰賊怒爭刃之事聞詔加實授指揮同知孫二徹徑徹以武顯徑之子尙赤尙卿以文

顯

陳舜本衛指揮使任黃花鎮守備嘉靖二十五年三月寇入境奮身率輕騎持兵截擊以衆寡不敵死之事聞詔加都指揮僉事

楊呈芳字桂林生而穎異敦謹孝友崇禎十年由貢生宰河南魯山縣勤政愛民勸農養士一時有慈父母稱明年盜賊蜂起十二年秋修書院完城郭練勇設卡爲守禦資十三年土匪詹思鸞爲亂呈芳與千總李一鳴謀斬之十五年土兵復亂登南城撫禦思鸞餘黨乘間賊之巨大亂僕吏逃散士民哀殮浮屠縣廨事聞贈汝州

知州銜人祀名宦門人並立專祠以祀私謚忠愍呈芳  
沒後城陷於流寇而明社遂墟干戈滿地道路阻絕

國朝定鼎子孫始得迎柩歸啟視面猶如生而事實惶遽  
莫考道光八年長白榮譽宰是邑景仰遺徽拓修舊祠  
春秋祭以少牢勒碑紀泣宦死事之顛末十八年其邑  
進士許夢蘭令於撫訪其後裔登堂拜像書聯額懸之  
家祠並揭榮令碑文俾載家乘後人始知政蹟殉難之

詳案明史附  
李貞佐傳

魯山縣重修楊公祠碑記云楊公祠祀明邑令桂林楊  
公公山海衛人諱呈芳桂林其字也崇禎十年秋由貢  
生來治斯邑廉幹有爲視民如子凡民所不便及所欲  
而未遂者罷之行之不俟終日一時有慈父之稱焉願



時方多難寇盜充斥而流賊復往來蹂躪居民惴惴欲逃公乃爲購弓矢鑄神器召募豪勇朝夕訓練視要隘設卡俾村寨各爲犄角互相救援倣戒備至賊不敢犯既復念城垣傾圯不堪守禦十二年秋七月乃下令日邑之有城所以壯觀瞻而資保障頽廢若此何以固吾圉乎廟相與修之者聽於是有力者輸力有財者輸財希錫雲集揀度潮興登登之聲聞數十里不半載而金湯屹若矣明年修葺學宮絃誦有所夏四月復增築元紫芝琴臺購屋三楹以資吟眺暇輒出郊勞農或集諸士子課文講學教之以孝弟忠信民大悅服是年六月練總詹思鸞等爲亂踞城跋扈挾以求撫公陽許之謀其解密令千總李一鳴擒殺之民賴以安越二年土兵復爲亂焚掠殺害殆甚思鸞公亟登南城撫之賊衆方猶豫會有思鸞餘孽竄迹其中遂爲所害時壬午四月十日也嗚呼公遇害七月餘而城爲流賊所陷明年再陷又明年天下土崩而明之社稷亦不血食矣悲夫邑故有祠其創建之由來不可考意邑民感公遺愛而爲之也顧祠宇卑陋且歲久將傾余欽公之捍寇固圉戡暴安民於兵戈擾攘之餘而能振興學校撫前賢遺跡而仰慕增築之卒之慷慨乘城以身死職雖古之緩帶

輒衰卑騎見同紀者何以加諸但其間有幸不幸耳爰捐資鳩工徵其舊以新之而加峻焉並於春秋仲月具一少牢以祭焉或曰公已嘗祀於名宦春秋之祭問閭子之爲是不亦贅乎余曰不然名宦者國家族賢之典也專祠者庶民懷德之誠也余之爲是者則以公慈惠忠毅實足爲吾輩後來者之矜式也況此祠創建有年不修則廢記曰有其舉之莫敢廢也新之所以懼其

其廢也贅乎哉是役也始丙戌季夏越一月告成邑訓導溇陽魯松書楊忠愍先生傳後云甚哉明季之亂也寇而日流非雄據一方者比汎其波於通都大邑而僻陋偏區罔弗遭其汨沒竊意當時筮仕者將任事則畏縮不前已任事則委棄而去不知凡幾若夫單車就道國而忘家勤政愛民屢變而不移其志如忠愍先生者當不易覲也先生於崇禎末年授河南魯山令邑衝民悍賊擾年饑先生治之裕如也後土兵不靖剿撫兼施臨難不苟從容就義至今土民思之祠祭不輟雖朱祠鄉之祀曷以過焉是可以風矣公本撫邑人籍山海衛崇祀鄉賢

王際明字清庵號泰寰駙馬塞人歲貢生崇禎間授廣平

府訓導才德優長以卓異薦陞陝西沔縣令莅任未兩  
月流寇乘夜襲城明執大鎗率家丁士民奮勇巷戰賊  
知不可奪黎明退出城池倉庫俱無恙獄中老囚猶不  
忍逃曰不敢以此累賢侯也頭帶重傷身中數十矢米  
漿不入口者數日具報部院洪承疇特疏題奏賊積恨  
不平復糾衆圍攻五十餘日不下將軍祖大器救兵飛  
集殺賊數千地方稍安城頭立有王侯血戰碑自是勉  
強供職舊傷時作屢乞休遲之三年方許歸百姓愛戴  
泣送二百里而後返由湖廣買舟東下因其子之某任  
徐州河糧廳攝刺史事遂至徐回抵德州我

王師剿賊已入山東界不得已退還臨清依舊撫令王臺家未幾

清兵入城賊潰喊聲四起明仰天嘆曰臣受恩不淺生無以爲報惟一死以報君耳遂登樓舉火自焚我

朝李總戎憫其忠而殮之厥後山左撫按交章入告部覆方下而闖賊已陷京師未沾恤典

國朝

惠應詔字如綸明季由武舉任薊遼督標副將順治元年英王略地西徇應詔首先歸誠二年正月招降延甯甘固諸營堡嗣因西安省會要地留守重任督撫合疏請

以副將管城守事西安洊經寇禍軍實久虛芻糧器械  
焚棄殆盡應詔視事閱月壁壘一新又闖賊所掠子女  
露宿風棲啼號遍野應詔收問鄉貫行移郡邑俾得各  
歸桑梓遠近歡聲如雷是年冬賀珍餘孽復熾圍西安  
應詔悉力固守三年正月率兵擊賊城下大敗之賊始  
遁尋陞成都總兵官以收潼川綿州累功授二等阿達  
哈哈番世襲五次應詔中傷身故於順治十八年三月  
十五日奉

勅書將親男惠占春仍襲二等阿達哈哈番再准襲四次

許永忠武舉歷任都司康熙三十六年從征噶爾丹戰歿

於陣照遊擊例

賜卹世襲雲騎尉無子爵除

董甯川留守營人由武舉掣兵部差官揀選營千總陞貴  
州鎮遠鎮標中營守備歷湖北襄陽鎮標前營都司興  
國營參將乾隆六十年二月奉派湖南等省出師勦捕  
賊匪賞健勇巴圖魯嘉慶四年四月二十二日在湖北  
竹溪縣梓桐垵斷甯川地方陣亡時年四十一世襲雲  
騎尉三次

諭祭葬

恩騎尉世襲罔替

以上忠烈

流寓

明

黃象奎江西贛州人原姓李名逢月天啟辛酉科鄉薦官兩當知縣以土寇破城逃匿至灤州祝髮蕭寺諸生蔡君見而異之勸勉蓄髮與其筆硯開館橫經後教授撫甯多所成就尤邃於易精岐黃之術施藥濟人全活甚衆卒葬紫荆山下

國朝

榮星吉字南垣江西義甯州人由武生授山東衛千總練

達老成循聲素著咸豐初改海運衛千總裁撤爲長子  
塋就親撫筭遂寓居焉慷慨好義強幹有爲同治二年  
設立團練規條操防戰守之具皆能鑿鑿言之談論經  
史結納文學士彬彬有儒雅風壽七十六卒葬城南楊  
家莊西北子二塋錐口鹽大使保舉知縣煦縣丞試用  
山東保升知縣

仙釋

沈環深河堡人幼得仙術言禍福多奇中相傳於嘉靖某  
年元夜與妻弟某騎木凳騰空跨海往蓬萊縣看燈環  
夜半卽回遺妻弟於其處丐食而歸環後不知所終



明見號弗一四川人以國變祝髮住錫衛城隍廟廟僻無人弗一子處誦經歷十餘年以五月七日坐化面如生寶德邑人姓楊名毓棟少業儒每疑生從何來死向何往二十六歲入邑庠王靈陽見之許爲再來人遂延爲西席偶語法偈覺悟頓生恍然有脫塵之想嗣後設教三韓遇純真和尚傳戒年五十祝髮於水雲寺時康熙五十九年也茹淡誦經年八十二自敘行實勒之石無疾坐化

來修邑之孤角嶼僧也遷安人幼祝髮人皆呼爲三和尚而性情鎮靜與常僧異康熙間化緣於石門寨正值天

旱會有賣雨買佛一事至今所買之佛尙存寺中後十餘年坐化有賣油者遇於溷陽言爲修工募化離寺匆匆有鞋一雙遺於禪房承塵上嗣後來此須爲拍來賣油某如言去取寺衆皆錯愕及尋之果然其師言此子已成今當周期伊邇非欲捐鞋實欲燒鞋也於是將鞋焚化墳塔前見鞋灰雙雙騰空西去云

善慶背牛頂布恩寺僧也山西太原人行高潔年二十六忽一日謂衆曰吾於七月初二日未時當茶毘遂募薪自架火籠以俟及期大雨人皆謂其難焚僧以微火引之卽然坦然升座說偈曰火光無情慈悲觀音風化我

屍隨我便行燒至骨其色如黃金一道青光冲天而上  
初遺言曰吾十二年當一歸及期諸僧忘之忽一丐者  
來癡甚見有蜣螂飛輒捉而食之又半吐之人多吐其  
穢及去視所吐盡栗皮人乃悟僧爲戲云此康熙年間  
事

程道真山東掖縣人康熙未來住邴各莊闢帝廟頗有道  
術乾隆六年自知羽化至期整肅衣冠談笑而卒里人  
葬之村北山坡號爲全真道人

歪老禪師不知姓名亦不知何許人相傳以舉人不第於  
國初時流寓聶口菩薩廟削髮爲僧人因其口眼歪斜率

以老歪呼之學甫書有得臨死語人曰某日吾將死將遺甫書枕吾頭下以殉之葬莊南某處如歲大旱禱墓側必助以雨至今鄉人尙屢禱屢驗

劉本裕口外土衛衛人以農夫披剃於廣甯山後歸住那各莊關帝廟及馬鞍山不茹葷酒戒殺放生冬日能赤腳行雪中後卒於縣東北科陀寺死後月餘有人遇之關外見其負蒲團而行問之曰往廣甯寺尋師也其人到家方知其死

撫甯縣志卷十五

列女

昔者蔚宗作史不遺失節之文姬中壘成書並列宣  
淫之南子豈不以中郎愛女見重於曹瞞衛國小君  
知欽夫孔聖也哉然而青閨恆訓不外無非無儀彤  
管芳型惟在能貞能孝使其才高德薄雖頌椒詠絮  
何足多貌美行污雖落雁沈魚亦可醜范書固濫劉  
傳亦僨矣撫甯近在畿甸之間首沐宮廷之化從容  
盡節巾幘乃有完人慷慨撫孤閨房深明大義灑斑  
痕於綠竹秋影堪悽抱秀色於蒼松冬心獨苦斯已

難能而可貴將欲舍此而焉求夫杵臼任其難猶是  
男兒血性匏瓜感無偶豈同織女獨居故摩黃崖而  
銘大節用彰恤緯之熒爇亦臨碧海而弔貞魂聊慰  
銜石之精衛志列女

明

高氏樊葛莊金禧妻年二十五歲禧故子鏞方二歲撫孤  
自守舅憐其少勉諭適人不從人有慕其容者爭求之  
氏閉戶以艾灼面勤女紅課鏞讀書後以子貴封孀人  
年九十終事聞詔立坊以旌其門

王氏縣民喬潤妻年二十六歲潤故子嵩在抱氏以節自

持撫子成立由貢生官山東長山令詔旌其門

李氏縣民姚斌妻年二十七歲斌故子政方在襁褓誓不  
他適以紡績供政讀書政舉永樂丁酉科鄉試累官兩  
浙鹽使贈太宜人詔旌其門

王氏本衛人翟昊妻年二十五歲昊故子鵬方三歲氏矢  
節自守閉門績紡課鵬讀書雖至親亦罕見其面鵬舉  
正德丁卯科鄉試戊辰成進士授戶部主事贈太安人  
詔旌其門有翰林院修撰康海旌表詩序

翟母王太安人身後旌表詩序云吾友都察院右僉都  
御史翟公志南生四歲而違育於先公太安人辛苦備  
嘗以撫志南焚燬一室餘三十年雖鄰里姻戚不能識  
面遠近聞者莫不以太安人之操爲難能顧籍錄戎伍

官曹未有以其事上聞者迨正德戊辰志南舉進士爲戶部主事會有勅封之恩太安人被與寵光安官榮養恤撫甯衛指揮陳勲具奏乞旌表以勵風俗方下禮部覈實而太安人旋卒京邸部以時制死者不舉其事遂寢志南讀禮於家值人有自吳下至者出大理評事李吉乞旌其母陳氏守節奏牘刊冊與太安人事若符契比終制援例懇請於上有命允旌宅里志南且喜且痛以爲太安人平生清苦萬狀幸獲微祿以養而年不逮百僅及六旬倏爾淪逝及蒙旌表盛典又爾不克躬親一時士大夫縉紳聞者莫不傷悼或爲歌詩風詠其事卷帙畫櫃玉映金輝僉憲張君履謙者志南之鄉人也素重太安人之節以書抵關內諸公及鄉之諸君子兼求歌詠以明颺太安人懿德謂海辱知志南宜序其事於首簡海聞太安人之德熟矣顧可以荒野辭耶當先在堂是思遂忍死以圖終養雖在寒窶而生事死葬物備禮盡悉無遺憾丈夫所不能而太安人獨能之視古之人矣愧也志南言其就學時太安人教詔之意猶極懇切每夜誦習則太安人就燈下執文事一日某長飲於所親歸晚太安人責某曰吾不能爲若母矣某因長



跪請罪太安人始指某泣曰爾父宜念也爾荒怠若此  
是能念爾父耶是使我無面以見爾父於地下爾何庸  
愚至是志南益自淬礪以求無負太安人之教故成名  
竟德一時知名之士皆莫之及者太安人之教深遠矣  
海惟人之成德雖本於天資學問而其薰陶漸染之力  
亦不可誣也太安人以苦節自甘終身嚴毅而志南克  
篤孝思迪哲於明如此又以見天之所以臨監於下者  
其感通昭應之妙的有可徵又如此先公之盛德太安  
人既以節報之太安人之節又以志南之孝報之是雖  
梓之應鼓影之應形何啻哉聖天子以仁孝化天下尊  
用德性登崇俊良而志南復以孝道節鎮大方行政施  
化吏民寅畏感慕有韓范之風則太安人之澤又將以  
及於無窮身後之褒贈方且有加未艾也豈止於前日  
表章宅里之一事耶海不佞願書以俟之嘉靖八年巳  
丑春三月廿又九日甲子賜進士及第前

翰林國史修撰經筵講官武功康海謹序

明徐珩題程節母旌表圖卷詩云在山泉水清出山泉  
水濁唐虞去我遠世道罹虔斷上下數千年事變幾更  
作太樸日云散淳風漸漓薄誰知綱常者宇宙仗持握  
男子有幾人心腸抱剛確矧伊文流輩彞倫誰與覺賢

哉太安人懿行孔超卓莊敬自天成鄉邦賴倡幸克相  
先封君何嘗計豐約天乎胡不憖封君適時煥春秋鼎  
盛年奄爾嗟淪沒武清訃音至悲風揚沙磧安人苦悲  
痛叫號動山岳瀕絕仍復甦幾乎莫救藥忍死欲何爲  
所係匪輕略上有舅與姑饗殮實所託下有憲副公于  
時尙嬰弱鎗鎗前執女功孜孜誠勤學鄰里絕往來心事  
自酬酢熒熒三十年幾度更裘葛節操凌冰霜懷乎不  
可奪正德戊辰歲奎星輝碧落蛟龍上天池鵬鶚運溟  
渤清階懸戶曹名望時孔碩迎我太安人就養高榮樂  
娛喜舞斑衣祝壽獻杯杓安人在堂前俯仰無愧怍封  
君逝地下含笑復欣躍邦人表貞節奏疏上黃閣嚴賢  
未及行安人殂京郭孝哉憲副公悲號不可遏晝夜無  
停時肝腸痛如割祿養傷未終終天恨難削援例復懇  
聞聖情良傷若命旨下秩宗褒封荷恩渥宅里生光輝  
坊第絢金燦正氣塞乾坤香名遍河朔海內刑  
母儀史筆紀顛末流芳千百年日月同照灼  
明包美題翟節母旌表圖卷詩云世俗滋漓異古時誰  
將棟幹自撐持節同金石神明鑒身任綱常天地知海  
內無人追母範朝中有詒表門楣他  
年史筆裁貞節遠邁共姜只誓詩

劉氏生員許俊妻年二十四歲俊故遺孤幼弱氏紡績自給撫子成立八十歲卒詔旌其門

李氏縣民金鼎妻年二十八歲鼎故無子氏誓不他適翁妾張氏劉氏亦感其貞烈與之同守衣食屢乏節操愈堅事聞詔旌曰一門三節

袁氏生員賈真儒妻年二十八歲真儒故氏絕飲食將自殉親屬勸之曰上有孀姑下有幼子若死將奚賴氏悟勉進飲食持家勤儉事姑教子孝慈兼盡其子繼志增廣生繼業廩膳生皆有所成立母教之力也年逾七十卒

貞女華氏本衛軍餘華壽女母潘氏年二十五歲壽回籍  
取討軍資去無音耗時女方五歲母曰夫去不回女幼  
無倚我將何之於是誓守弱息貧苦不恤及女稍長母  
欲議婚女曰母爲我守我安忍離母哉誓不嫁與母共  
甘苦四十年母故厝母柩於床側破屋半間不蔽風雨  
衣食屢缺惟閉戶持齋誦經至萬思七年病故鄰里憐  
之爲之助棺舉塋焉知縣徐汝孝上其事詔旌曰貞孝  
之門

烈女趙氏一片石軍人趙來住之女年十四其母以事入  
鄰家有駐劄軍馬鐸窺母不在假借針以挑女女怒手

批其面軍驚走遂悲憤自縊死本府張公世烈勘其事  
寘軍於法爲營塋樹碑立坊以旌之

王氏縣庠生王堯相妻年二十一歲堯相故晝夜號泣勺  
水不入口姑以姑老子幼諭之始毀容截髮勉事鞠育  
姑病痿飲食扶掖克盡其孝姑卒祭葬如禮子調元領  
萬厯戊午鄉薦直指劉公思諱具題旌表有云錚錚一  
具鐵心慄慄滿腔血性姑無缺養九泉子職代供子賴  
成名半世書香不泯蓋紀實也

朱氏李鶴年妻二十六歲夫故撫孤天培成名偃曰孀節

松齡

范氏任子孝妻二十七歲夫故茹藥食苦匾曰鶴齡松節  
惠氏州同郭朝元妻二十九歲夫故撫孤遊庠匾曰矢志  
和丸

賈氏楊枝盛妻二十四歲夫故撫孤遊庠匾曰矢志詒經  
周氏溫應學妻二十四歲夫故撫孤成立匾曰貞節

祝氏都司陳復先妻撫孤成立匾曰貞節

傅氏廩生王有慶妻二十七歲夫故撫孤遊庠享年九十

扁曰松筠節壽

張氏生員蕭春育妻夫故守節撫孤成立匾曰共操孟訓  
徐氏生員傅大成妻二十七歲夫故撫三子皆遊庠匾曰

孝慈貞壽

單氏生員蕭奇幹妻夫故撫孤遊庠匾曰節孝可風

楊氏生員鍾朝傑妻二十七歲夫故撫孤遊庠匾曰感燕

和熊

董氏王隆明妻二十七歲夫故撫孤遊庠匾曰孝慈節壽

楊氏李守敬妻二十四歲夫故撫孤成立匾曰清節遐齡

魯氏劉天學妻守節終身匾曰節孝

高氏進士田國足妻二十七歲夫故撫孤遊庠匾曰柏節

遐標

樂氏馬成爵妻二十一歲夫故子方在抱上有孀姑匾曰

一門節孝

史氏趙中正妻夫故撫孤成立享年八十匾曰高節遐齡  
張氏生員田如梁妻十九歲夫故撫子遊庠匾曰節堅金  
石

張氏羅士儉妻夫故撫孤成立匾曰節凜冰霜

王氏楊會妻二十二歲夫故矢志苦守撫孤成立匾曰節

凜秋霜

楊氏張國仕妻二十二歲夫故子甫三歲撫孤守志匾曰

貞節

劉氏楊鳳翼妻二十四歲夫故守節撫孤備嘗艱苦郡守



旌其門曰幽谷之蘭

田氏生員陳斯文妻二十五歲夫故撫孤成立苦守六十餘年

党氏惠應徵妻夫故撫孤守節終身

惠氏生員茹良翰妻二十七歲夫故守節至八十歲而終  
夏氏生員邱行三妻夫故子女俱無守柩四十餘年以歿  
親族爲之合葬

黃氏焦明卿妻十七歲夫故守節終身

楊氏朱廷佐妻二十四歲夫故守節撫孤五十餘年

賀氏孫承宗妻二十歲夫故守節撫孤成立

郭氏鄭起鵬妻二十七歲夫故守節撫孤成立

惠氏鍾之彥妻二十四歲夫故守節撫孤成立

董氏齊步瀛妻二十二歲夫故守節撫孤成立

趙氏齊應聘妻二十四歲夫故守節撫孤成立

惠氏傅稟成妻二十八歲夫故無子苦守六十餘年

張氏總旗田芳顯妻二十歲夫故無子守節六十餘年

傅氏賈一麟妻二十歲夫故子女俱無守節四十餘年以

### 壽終

任氏生員唐之魁妻二十歲夫故守節四十餘年匾曰貞

### 節

烈婦孫氏陳天祿妻舅姑以無子令改嫁不從自縊死

陳氏單勉行妻二十三歲夫故撫孤守節壽八十餘匾曰貞節

楊氏生員陳鴻策側室夫故守柩十年餘茹藥食貧苦節終身

陳氏生員馮永清妻二十八歲夫故撫孤成立匾曰彤管有光

馬氏武生金啟成妻二十七歲夫故無子苦守奉事舅姑族人憐之爲繼姪立後匾曰貞節

鄒氏楊克禮妻二十歲夫故無子堅志守節壽八十餘

王氏知縣蕭筆妻二十四歲夫故撫孤成立匾曰節孝德門

張氏王一元妻十九歲夫故家貧姑老子未週歲苦守五十餘年

張氏王晏妻祖氏王振祖妻夫故子皆週歲苦志守節撫孤成立匾曰姑媳雙節

陳氏生員高科妻二十四歲夫故子方在抱撫孤遊庠苦節五十餘年匾曰貞節

趙氏王址妻二十五歲夫故苦守三十六年

趙氏武生楊毓英妻二十七歲夫故守節撫孤成立

劉氏高庭桂妻夫故守節撫孤成立匾曰孝慈仁壽

以上舊志未詳年代自李鶴年妻朱氏以下疑有本朝

一人

國朝

陸氏生員王紹先妻二十一歲夫故無子遺女方六月矢

志殉節姑諭以撫養後女復夭自縊死康熙二十年

旌

齊氏趙文炳妻二十一歲夫故無子孝事孀姑勤紡績以

供甘旨撫夫弟以續宗祀守節三十餘年康熙五十二

年旌

烈女典姐宋有懷室女幼許字蘭姓夫亡投繯死康熙年

旌

李氏彭瑾妻

趙氏郝明颺妻善事舅姑夫亡後孝敬彌篤姑憫其勞慰之曰胡不少憩答以勤動是婦職且以儆兒女輩耳雍正

正五年 旌

馮氏郝善繼妻能執婦道與孀姑趙氏相依俱以節著雍正

正五年 旌

曹氏孫印蕃妻二十五歲夫故紡績爲業夜分機聲不絕

教子讀書入泮雍正二年 旌

劉氏郭如朱妻

張氏俞承恩妻夫貧就食關外事孀姑無缺禮二十六歲夫故姑亦尋歿挈孤子員土爲墳終身不歸甯嘗大雪封門外無人跡人以爲死而機聲外聞守節至六十三歲雍正十年旌

祖氏劉成柱妻二十七歲夫故事姑承順撫姪娶婦婦亡撫孤孫成立及見曾孫守節至六十六歲雍正十年旌

傅氏呂儲元妻

魏氏呂正德妻

趙氏劉傑妻

馬氏林鳳至妻

王氏胡宇仁妻二十歲夫故遺腹生子自立孝事翁姑紡績度日守節三十三年乾隆四年旌

蕭氏生員單鈐妻二十一歲夫故善事舅姑撫子成立苦節三十年卒乾隆四年旌

賀氏劉琛妻

遲氏張廷拱妻二十一歲夫亡力勤織紡矢節不移

茹氏胡連妻

李氏王三錫妻二十九歲夫故子進賢十一歲奉事翁姑



紡績度日乾隆四年 旌

王氏孫文正妻

鄭氏單銓妻二十六歲夫故守節五十九年乾隆四年

旌

王氏張希閔妻二十四歲夫亡遺孤週歲至五歲而殤繼

族孫爲嗣孝事舅姑熒熒貧苦志節皎然乾隆三年

旌

王氏孫文智妻二十四歲夫故子女俱無乾隆四年 旌

姜氏李尙亮妻二十七歲夫故子蕃僅三歲守節四十八

年乾隆六年 旌

呂氏王基舅妻

傅氏郝鳳儀妻

田氏李藩妻二十四歲夫故子克疑方三歲守節三十二年子入邑庠乾隆六年旌

李氏趙憲妻二十二歲夫故子女俱無以翁姑在堂守節三十三年乾隆九年旌

袁氏單從新妻吏員德正女二十五歲夫故子僅二歲乾隆十二年旌

王氏董朝龍妻二十一歲夫故無子乾隆十二年旌

高氏惠來春妻二十九歲夫故子振先方週歲孝事舅姑

教振先中武舉乾隆十二年 旌

徐氏王誥妻二十二歲夫故善事孀姑撫姪爲子乾隆十二年 旌

徐氏陳德修妻二十四歲夫故子方三歲事舅姑克盡孝道孫允恭入武庠乾隆十二年 旌

程氏解朝佐妻二十六歲夫故奉事翁姑撫孤成立乾隆十二年 旌有石坊

孫氏李璇妻揚州都司孫法秀女二十八歲夫故子幼孝事舅姑後子天與弱媳同守貞節乾隆十二年 旌

甯氏李龍泉妻盧龍生員甯挺女二十六歲夫故子無襁

卹堂有舅姑乾隆十二年 旌

徐氏方明妻二十一歲夫故撫姪爲子善事舅姑紡績度  
日乾隆十二年 旌有石坊

程氏陳心章妻二十六歲夫故姑老子幼又復夭折乾隆  
十三年 旌

嚴氏李有功妻

金氏楊明妻二十一歲夫故子天相方三歲孝事翁姑子  
天撫姪孫熙爲嗣乾隆十三年 旌

李氏暴麟生妻二十一歲夫故善事翁姑喪葬盡禮教繼  
子文能有義方乾隆十三年 旌

姬氏楊天純妻二十一歲夫故子文皆無孝事翁姑繼姪  
拊爲嗣守節五十六年乾隆十四年旌

趙氏李獻之妻二十二歲夫故守節五十四年乾隆十五  
年旌

夏氏王崙妻二十七歲夫故遺腹子化淳上有翁姑紡績  
是資守節四十六歲乾隆十七年旌

王氏生員翟琪妻滕縣知縣王調元女二十六歲夫故撫  
週歲子善事孀姑乾隆十七年旌有石坊

徐氏翟繼妻二十五歲夫故善事舅姑撫子培祖入邑庠  
乾隆十五年旌

孫氏趙秀齡妻

馮氏安文傑妻

李氏張起雲妻

程氏吳從義妻

田氏楊旺妻

貞女張氏幼許字謝煥七歲失怙恃撫於孀孀二十二歲  
未嫁而煥亡奔喪守節三十四年乾隆三十年旌

郭氏張明德妻

趙氏崔國良妻

李氏楊作楫妻十九歲于歸數月夫故撫繼子緒宗成立

代事舅姑勤於紡績乾隆三十六年 旌有石坊

李氏袁宗凱妻二十二歲夫故奉事衰親菽水承歡乾隆  
四十一年 旌

穆氏趙瑛妻

烈婦李氏董銳妻生員董悉愉子婦盧龍生員李汲次也  
十八歲夫故守節十三年因遭醉侮服瀉自盡雍正九  
年 旌

賈氏李琬妻

劉氏茹漢妻二十四歲夫故事衰姑紡績自給撫夫姪景  
梁爲嗣後充歲貢乾隆五十三年 旌

惠氏茹瑛妻十九歲夫故撫從姪苦守終身康熙九年

旌曰天植貞操

傅氏楊燧妻

貞女溫氏生員溫潤女同邑徐嗣聘妻也幼失怙恃育於  
兄嫂年十五未婚而嗣亡奔喪守節赤貧如洗代養舅  
姑嘉慶六年旌

翟氏于成妻

惠氏俞標妻生員惠縫女二十二歲夫故三日生遺腹子  
文炤教人邑庠守節六十二年

劉氏程用妻二十一歲夫故子女俱無翁姑在堂乾隆五



十一年旌

楊氏王柱妻

王氏魯知止妻監生王念華女年二十夫故繼姪爲嗣紡績是勤守節四十一年道光二十九年旌

邵氏馮開第妻二十七歲夫故翁姑無依義不可死守節三十一年道光十七年旌

烈婦常氏馮開樽妻年二十夫歿於甯遠自縊以殉咸豐元年旌

以上旌表入祠

劉氏徐洞達妻二十六歲夫故上事舅姑撫堂姪信爲子

教訓成名守節六十餘年

諸氏生員徐信妻二十二歲夫故奉事孀姑勤女紅以供  
甘旨繼姪文藻爲嗣守節三十餘年

唐氏賈廷連妻臨邑監生唐世裔女二十一歲夫故善事  
翁姑撫夫姪應元遊庠食餼乾隆十五年旌

李氏王雷妻舉人李玉柱女二十四歲夫故代事舅姑繼  
姪得貴爲嗣守節四十三年嘉慶九年旌

曹氏韓察妻興盛峪人年十六適韓未及一載而察亡父  
母憐其少欲奪其志氏聞言哭泣幾不欲生父母知其  
意堅不從陽諾之而陰以許人嫁期將至事洩氏託挑

菜逃歸夫家入門大哭姑問故道其始終從此矢志守  
節日夜績紡雖有娣姒而奉姑之事皆一人自任終身  
不歸甯卒年七十九嘉慶十三年 旌

烈婦梁氏楊黑頭妻因被施瘦頭辱罵服毒死道光二十  
三年 旌

王氏金培瑛妻二十四歲夫故翁姑久病奉侍湯藥守節  
三十年咸豐元年 旌

董氏生員王本源繼妻參將董甯川女二十九歲夫故守  
節咸豐三年 旌

張氏李希賢妻二十四歲夫故紡績供養孀姑姑歿典衣

以葬守節三十五年同治三年 旌

傅氏王化雨妻二十六歲夫故紡績維殷備嘗艱苦守節

四十二年同治三年 旌

楊氏賁材妻二十歲夫故守節五十四年同治三年 旌

劉氏吳琢妻二十五歲夫故守節三十二年

王氏史俊儒妻二十四歲夫故遺一女奉祖姑與姑廿餘  
年守節自勵同治四年 旌

以上準 旌未入祠

王氏高瑞徵妻東陳各莊人年十四養於夫家姑性悍日  
事苛責氏執婦道惟謹姑病刲股和藥因是獲瘳姑乃

感泣爲之成禮益愛憐焉雍正八年邑尊裘公獎曰賢孝可風事聞旌曰至誠格天

李氏王楨妻都寨人十九歲夫故孀姑垂白子吉士在襁褓仰事俯畜兩任其難守節五十一年乾隆二十四年旌

傅氏趙奎妻年二十六恪盡婦道乾隆十一年四月姑病刲股和藥以進病頓瘥邑侯鏐公獎曰誠心孝姑

薛氏歲貢徐升聞妻三十二歲夫故教子阜年遊庠食餽學憲徐獎曰九熊畫荻

陳氏張選妻洋河套人二十五歲夫故翁姑衰老子在懷

抱相繼而亡子身孤栖族黨爲擇子作揖承嗣得列邑庠守節四十四年乾隆三十五年學憲倪獎曰冰霜勵操

張氏陳扶妻棄園人十八歲夫故上有翁姑下無子女守節五十七年乾隆五十年請旌

聶氏陳宗堯妻棄園人二十四歲夫故衰翁在堂子吉方三歲與伯姑張氏貞操共勵守節四十七年乾隆五十年請旌

馬氏周於德妻沙子窩人二十八歲夫故子魁方三歲翁姑年皆垂白氏竭力奉養持家勤苦乾隆五十年卒年

八十八守節六十年子納監孫萬入邑庠

胡氏湮永成妻二十歲夫出關服賈子方三齡堂有孀姑  
永成久無耗值年荒糠粃弗給氏攜子乞食以養姑疾  
思肉不可得乃割臂爲羹以進之姑病良已鄉里微聞  
之而氏終不自言後年七十餘盛夏解衣鄰姬見瘡痕  
始實告曰此一時情急不足爲外人道也

陳氏王有容妻二十二歲夫故以家業難理繼姪大謨大  
智爲嗣姑攬老疾氏割臂爲羹以進姑由是愈

祖氏孫君德妻四趙各莊人十九歲夫故上有衰姑下無  
幼子家貧食力盡孝盡誠數年始立週歲姪爲嗣守節

三十餘年乾隆六十年請旌

張氏李珠妻牛頭崖人二十七歲夫故翁姑皆逾六旬無子女以姪逢春兼祧翁姑沒喪葬如禮守節三十九年  
嘉慶二年請旌

陳氏李珣妻牛頭崖人二十四歲夫故遺孤逢春方二齡與嫂張氏教養成立妯娌勤於績紡守節三十八年嘉慶二年請旌

趙氏郭琅妻端士河人十九歲夫故翁衰叔幼艱苦備嘗守節四十四年嘉慶十九年請旌

韓氏鍾璽妻東關人年十七歲璽病倉卒成婚俗謂之冲



喜姑俞氏日夜伴宿甫入朝璽以悻卒依然女身也守節至七十二歲卒

郝氏楊浴妻姑各莊人二十二歲夫故撫姪若桓爲嗣守節二十九年卒

栗氏劉文新妻迷霧人二十九歲夫故子大奇方五歲紡績度日撫孤成立苦節四十二年壽七十一

郝氏陳君政妻三十四歲夫故堂有嫡姑子謨方幼守節四十餘年道光十一年學院沈獎曰松柏堅貞

馮氏張景岳妻臺頭營人武生馮泳文二十四歲夫故子在懷抱翁姑衰邁事畜無虧守節四十四年道光十二

年請旌

楊氏生員馮鏞妻臺頭營人二十七歲夫故無子繼姪瑞符爲嗣守節四十餘年七十三歲卒

韓氏李作棟妻深河人二十八歲夫故止遺一女以姪煜兼祧翁出遊幕姑老病叔作楫尙幼氏支持門戶至八十六歲而終同治八年學使賀獎曰節勵霜筠

季氏李連用妻十七歲于歸數月夫故代養翁姑紡績度日後以姪永泰兼祧六十七歲卒

烈婦史氏喬萬選妻二十七歲夫病篤囑氏改嫁以圖存活氏泣曰君死妾不獨生夫歿飲藥死

郭氏楊倫妻石河莊人二十一歲夫故家貧事翁姑克孝  
喪葬竭力七十餘卒光緒元年府尊游公獎曰節松霜  
筠

陳氏張熾妻歙箕營人二十二歲夫故家貧食力子身苦  
守五十二歲卒

周氏張森妻山嘴頭人成婚一夜夫出不歸氏代事翁姑  
喪葬如禮儒學訓導李元芳撰文以紀其事守節六十  
餘年卒

王氏樊尙武妻崔鐵營人十七歲于歸甫四月而夫故守  
節二十九年卒光緒元年府尊游公獎曰百日千秋

張氏俞躍升妻臺頭營人二十七歲夫故撫孤成立守節  
五十六年八十三歲卒

陳氏張登岳妻臺頭營人二十四歲夫故子旋天撫繼子  
雲入邑庠守節五十七年八十一歲卒

曾氏王會徵妻曹東莊人十九歲于歸甫月餘而夫故守  
節四十年五十九歲卒

孫氏李克勤妻臺頭營人二十二歲夫應縣試以溺死無  
子撫姪文潤爲嗣守節三十二年五十四歲卒

賈氏梁廷璽妻大新寨人二十二歲夫故撫姪惠爲子守  
節四十四年咸豐十一年卒

池氏董珍繼妻馬家峪人十九歲夫故撫前妻子作新成立守節三十年道光十一年卒

李氏張儒位妻大新寨人十七歲夫故撫姪魁爲嗣守節五十五年同治元年卒

王氏楊開識妻茹各莊人二十五歲夫故撫姪鳳爲嗣守節五十一年咸豐八年卒

楊氏李開銜妻茹各莊人三十歲夫故撫孤子三人成立守節五十一年

金氏李廷魁妻茹各莊人十九歲夫故撫姪笠爲子守節五十八年

楊氏張敏妻馬坊人二十五歲夫故守節五十四年

陸氏楊皖妻茹各莊人二十四歲夫故撫孤得山成立守

節五十年

趙氏高連陞妻棗園頭人二十七歲夫故撫孤成立守節

四十年

周氏陳桐妻田各莊人二十四歲夫故守節三十七年

陳氏童生李兆麟妻田各莊人二十六歲夫故撫繼子蔭

檀遊庠守節六十五年

許氏張學舜妻桃園莊人十九歲于歸甫三月而夫賈於  
外五載始歸旋又外出旣而病故時氏年二十九聞訃

幾不欲生又念撫孤無人嗣續將絕更兼夫柩未返乃  
哀乞親族助資歸櫬殯葬如禮家僅薄地二畝土房半  
間日夜織紡教子成立鄉人咸欽重焉卒年七十一

張氏監生王寵陞妻二十八歲夫故撫孤守節上奉舅姑  
孝養罔缺道光三年姑得痰疾不能轉側氏左右扶掖  
侍藥三年無倦色無怨言姑歿勤儉持家尤能訓子課  
孫俾之成立咸豐二年二月九日呼兒孫集前囑曰家  
傳祖訓片紙不入公門汝等各宜恪守以遺後嗣有子  
孫者尤宜以耕讀教之俾有常業毋怠毋荒言訖無疾  
而終時年八十三歲

王氏堰溝屯呂琨妻琨十七歲病故氏時年二十二矢志守節繼姪士明爲嗣苦守六十三年八十五歲卒

張氏武舉陳國標妻本城人年三十夫故子慕元方五歲氏矢志節自勵辛苦備嘗初撫胞姪慕夏爲子及慕元長與慕夏友愛甚篤相繼入武庠慕元加守備銜修身立行得母教爲多氏守節三十餘年卒年六十九

趙氏楊若松妻本城人二十九歲夫故守節上奉舅姑生事死葬無缺禮下撫四子茹藥食貧備極清苦卒年七十五

李氏王湧妻本城人三十歲夫故守節遺孤幼弱貧苦難



堪子稍長服賈於外衣食得以不缺氏持家勤儉苦守五十餘年卒年八十八

武氏王士鈞繼妻本城人二十七歲夫故守節撫孤事舅姑孝慈兼盡子入武庠後子故家貧同孀媳幼孫典屋而居飢寒不免尋其孫又夭姑媳二人寒燈績紡日僅一餐近族憐其年老無依時招養之卒年七十九

吳氏邑進士蔭松少女也適城內員外郎銜單光裕爲繼室道光十年氏年二十五夫故無子氏閉戶毀容雖族人不能輕識其面家不甚窘而矢志獨苦一切服食器用都從節儉年六十九無疾而終

楊氏武童鄭世英妻五各莊人二十三歲夫故守節二十四年

烈婦高氏蔡錫田妻城角莊人于歸甫五月而夫故氏卽時仰藥死時年二十一

陳氏張寬妻仁村人二十八歲夫故遺二子曰士文士武皆幼茅屋三間家無儋石儲有勸之改適者堅拒之晝則傭女紅夜則勤紡績糴升合餬口子稍長爲人牧牛或乞食自給數年後令作小經營家漸裕始各爲娶婦氏服勞如故士文性至孝母歿罄餘資以葬今八十餘話及鞠育恩猶潄然淚下也

安氏王復春妻河潮營人二十五歲夫故守節五十八年  
聶氏李兆經妻蒲藍李莊人二十一歲夫故守節六十五  
年

王氏張玉坤妻口外張家帳子人二十三歲夫故守節五  
十五年

高氏劉景順妻二十五歲夫故無子父夫弟無目亦死姪  
遠出不歸翁姑殘疾氏以紡績養生送死無親屬可依  
孑然一身守節二十餘年五旬餘窮餓縊死聞者傷之  
張氏王柱妻小李莊人克盡婦道貞節可風

徐氏楊開第妻楊家莊頭人二十四歲夫故無子守節二

十六年

王氏孫耀妻大李莊人二十六歲夫故守節三十年

陳氏李鵬雲繼妻前石河人二十三歲于歸甫六月而夫故撫前室五歲孤成立守節三十餘年光緒元年府尊游公獎曰松柏貞操

張氏楊上林妻河潮營人二十歲夫故守節三十餘年同治十三年旌

徐氏胡連元妻胡戶頭莊人二十歲夫故守節三十年

侯氏武生侯一清女張程道妻南新莊人二十七歲夫故子女皆無守節三十八年

茹氏王錫田妻臺頭營人增貢生茹景朱女二十歲夫故  
守節四十年

祖氏張克儉妻齊各莊人二十九歲夫故守節二十六年  
府尊游公獎曰操矢柏舟

賁氏楊向榮妻上徐各莊人武生賁克猷女二十一歲夫  
故守節三十二年郡守游公賜匾以榮之

孫氏生員王步陵妻界嶺口人二十三歲夫故守節三十  
年

李氏王殿明妻上官營人二十二歲夫故守節三十三年  
周氏張鵬舉妻縣城人二十八歲夫故遺二子俱幼翁姑

三  
在堂養葬盡禮守節二十餘年道光二十八年卒

汪氏王希敏妻邑西南范家莊人年二十四夫故撫遺腹子成立食貧守節四十二年咸豐二年卒郡守游公旌其門曰貞操天植

吳氏箭杆嶺郭從儉妻二十四歲夫亡無子苦守賢聲素著卒於乾隆五十七年年六十一計守節三十八年

郭氏張名德妻十七歲于歸後九日夫卒孤苦無依貧不能給含冰茹苦歷十餘載乾隆三十三年學使德公由詳奉 旨旌表賜匾曰大家壺範

劉氏金泰之妻十八歲夫故翁姑俱老子女皆無矢志全

貞鄉鄰共慕道光二十四年學政馮公奏請奉 旨賜

匾曰勵節垂型

梁氏王淑襄妻 旌表賜荻影霜清匾

盧氏高玉梅妻二十三歲守節冰霜自矢貧苦度日至老  
不少衰

蔣氏武庠生詹傑妻嘉慶二十年夫故守節卒於同治五  
年苦節四十九年壽七十六

毛氏臺頭營談玉發妻二十九歲夫故守節撫孤成立苦  
節四十五年壽七十四

王氏賁魁妻二十七歲夫故守節閉門績紡課子讀書姑

病痿飲食扶掖克盡其孝子大文入武庠大訓入文庠  
婦道母道克盡無遺年九十卒

張氏趙泌妻城南小趙莊人二十九歲夫故守節撫孤備  
嘗艱苦衣食屢缺節操愈堅歷五十五年如一日

呂氏武生賁勲妻二十五歲夫故守節上事舅姑婦道無  
虧遺孤成室十年卽亡氏繼孫承祧撫訓成人五十七  
歲卒

田氏州同賁大典妻二十五歲夫故無子繼姪承祧上奉  
孀姑下撫幼嗣慈孝兼盡六十六歲卒

李氏陳家園陳世中妻咸豐六年時年十九歲夫故無子



艱苦備嘗誓不他適同治十三年卒

烈婦單氏洋河套張允天之妻東河南莊人幼失怙恃鞠於兄嫂于歸後夫家赤貧無隔宿糧氏孝事舅姑勤於女紅夫經商病歸死之先氏治殮具已乃於夜分焚香祝天誓以身代引刀刺脅未遽絕母族有無賴者欲構訟氏力排之言吾襁褓喪親今又早失所天胡以生爲且吾嫁十年家室融融不聞勃谿鄉鄰所悉若輩借端滋事使吾死後得悍名九泉有知當必殛之羣謀乃寢越日與夫俱亡時年二十七

唐氏郭連書妻圈子營人二十三歲夫故代養舅姑撫姪

鍾成立耐貧守節見年七十六歲

楊氏李占元妻臺頭營人二十四歲夫故見年五十一歲

周氏薛景然妻臺頭營人二十歲夫故無子翁姑卒竭力

殯葬守志食貧光緒二年準旌見年六十

張氏徐志槐妻范各莊人二十四歲夫故無子食貧守節

見年六十七

程氏徐志柏妻范各莊人二十八歲夫故遺二子食貧守

節見年六十

荆氏朱檀妻二十八歲夫故無子女食貧守節見年六十

趙氏卷子營郭士發妻光緒二年府尊游公旌以勁節凌

霜額

劉氏樊各莊常兆蘭妻光緒二年府尊游公旌以節比松

筠額

張氏楊永清妻年二十九歲夫故無子守節五十餘年見  
年八十三歲

崔氏王揆倫妻東平市莊人二十五歲守節足不越閭外  
數十年如一日見年五十八歲

楊氏劉耀春妻二十五歲夫歿守節見年五十五歲府尊  
游公賜額曰節苦心貞

李氏張殿升妻十九歲夫歿守節見年五十六歲府尊游

公賜額曰苦節貞心

孟氏金錫勇妻二十二歲夫歿守節見年五十八歲府尊

游公賜額曰貞同松柏

金氏常鎧妻二十五歲夫歿守節見年六十五歲府尊游

公賜額曰立志堅貞

單氏東河南莊張喜妻二十歲于歸十年而夫故氏賦性  
簡默同居者從未見其疾言遽色夫家母家皆赤貧且  
無子有老姑在堂誓志不嫁績紡以奉其姑終歲常不  
給其從堂兄單德林勗其義盡力周之見年五十九

王氏岳聲妻東桃園人二十八歲夫故撫子曾詹入邑庠

見年八十歲曾孫殿邦亦入邑庠

魏氏單鳴韶妻東河南人十五歲于歸甫期而夫故苦節  
自守孝養舅姑撫幼姪成立府尊游公獎曰心堅鐵石  
見年七十六歲孫吉慶妻周氏十七歲于歸逾月而吉  
慶歿侍養祖姑日夜左右之嘗語人曰祖母壽百年吾  
終身有倚矣後以哀感成疾卒時年二十九

李氏王汝起妻盧各莊人二十六歲夫故撫孤鑣成立見  
年七十五歲

王氏余躍魁妻李家莊人二十五歲夫故撫孤桐成立見  
年八十二歲

張氏楊開蔽妻茹各莊人二十四歲夫故撫姪葆爲嗣見  
年八十二歲

馬氏李琨妻臺頭營人二十五歲夫故繼姪清玉爲子見  
年八十一歲

吳氏任有廉妻紙房莊人十九歲嫁未三月夫外出不歸  
氏與娣張氏紡績自給孝事孀姑三十年親爲營葬以  
姪尊兼祧苦節不渝見年七十九歲

王氏楊銳妻茹各莊人二十三歲夫故以姪得全兼祧見  
年七十八歲

李氏楊時明妻紙房莊人二十二歲夫故繼姪倫爲嗣見

年七十七歲

武氏李穩妻茹各莊人二十三歲夫故繼堂姪孫新權爲嗣見年七十五歲

吳氏丁榮章妻洋河丁家莊人十八歲婿未三月而夫故繼族姪珺爲嗣見年七十五歲

狄氏張永虎妻張各莊人二十九歲夫故撫孤怡成立見年七十二歲

孝女張氏茹各莊人張清女母卒父年邁矢志不嫁以針黹供甘旨並教弱弟成立見年七十二歲

武氏張雲立妻張家莊人十六歲夫故守節見年八十四

歲

陳氏李麟妻茹各莊人二十七歲夫故撫孤成立見年七

十一歲

宗氏儒童郭其宗妻東王各莊人二十二歲于歸數月而

夫故生遺腹子文郁撫養成立孝事翁姑喪葬如禮見

年七十一歲

張氏李發妻茹各莊人二十七歲夫故撫孤成立見年六

十九歲

高氏賁蘭坡妻沙坡人庠生功元女二十一歲夫故撫養

繼子孝養翁姑守節四十七年見年六十八歲光緒元



年府尊游公獎曰彤管揚芬

俞氏曾玉妻臺頭營人二十九歲夫故家貧無子矢志苦  
守見年六十七歲

宗氏生員周連科妻沙子窩人二十七歲夫故遺二女無  
子又生遺腹女以香烟莫繼卽欲捐生因翁姑衰老代  
任子職見年六十七歲

張氏馬景雲妻麻官營人二十三歲夫故二子幼姑亦旋  
卒叔方二齡氏皆撫養成立見年六十五歲

袁氏柳向青妻青山口人十九歲夫故以姪池兼祧見年  
六十四歲

劉氏傅文錦妻棗園頭人二十四歲夫故撫孤弱成立見  
年六十四歲

吳氏李作梅妻田各莊人二十三歲夫故撫孤春熙遊庠  
見年六十三歲

楊氏王永妻深河人三十歲夫亡於外遺一子大猷家甚  
貧賴紡績以活兒晝拾薪夜使讀書苦難萬狀後子授  
千總職孫貴入太學氏年九十六無疾而終鄉里題其  
門曰節壽雙高

陳氏王銓妻深河人十八歲于歸甫一月夫隨翁經商卒  
於逆旅氏聞訃痛不欲生適有夫弟夫婦相繼亡幸遺

一姪乃撫養之兼理家務翁姑年邁能代事承歡時終日一餐而甘旨不缺見年七十四歲同治八年學憲賀獎曰冰玉爲心

宋氏趙驕妻深河人夫素跛廢扶持無怨言二十歲夫故代事翁姑和睦妯娌撫四齡子凌雲成立充貢生見年七十四歲同治八年學憲賀獎曰節孝可風

王氏趙開雲妻深河人二十二歲夫故一女未週歲亦天代事孀姑女紅自課撫姪爲嗣見年五十七歲

劉氏王奇文妻深河人二十歲夫故無子姑年九十二歲歡顏承奉見年六十一歲節孝兩全鄉里欲爲請旌

辭曰節是婦人本分事何用名爲

王氏趙穩妻猩猩峪人二十八歲夫客死遼東止遺二女  
繼姑在堂伯氏強之分爨氏獨養繼姑貧常不給宅後  
近山晝樵夜績處之晏如守節三十餘年見年五十九  
歲

馮氏監生李逢元妻端士河人二十七歲夫故無子繼堂  
姪端爲嗣十六歲又殤氏與孀媳劉氏苦節共勵撫族  
孫美成立同治十三年壽七十一而終劉氏見年五十  
五歲生員劉居仁女

蕭氏生員陳珍妻陳家莊人二十九歲夫故遺二子家本

儒素翁應麟副貢生訓蒙餬口不數年叔夫婦俱亡氏次子亦夭撫孤持家尤勤孝養翁年八十二姑年八十九各以壽終由侍疾迄喪葬皆氏躬親見年七十歲常依母家以居

王氏陳沐妻陳家莊人二十二歲夫故代事翁姑和睦妯娌翁姑沒始與伯氏析產繼子鳳儔爲嗣見年七十八歲

梁氏秦莊頭梁如柏女如柏先娶張氏無出客吉林又娶孫氏生二女長卽氏也年九歲母孫故喪毀如成人依父膝下祖俊教之讀書通章句以祖父俱業醫兼讀方

書識藥性十七歲祖俊歿氏感陳情表苦衷繡佛長齋  
以報祖德時妹殤獨與父居針黹自課二十四歲適李  
祥咸豐七年聞嫡母張氏卒于家弗克奔喪爲位持服  
明年父捐館權耐于孫母墓痛鮮兄弟不得已也又六  
年而祥故氏時五十矣愴然曰狐死首邱吾父母返葬  
撫甯九京無憾吾雖非男子其何敢不力乃舉二棺跋  
涉千八百里經營畢事復慮鬼餒無歸也立堂叔如雲  
之子梁順兼祧奉父母祀爲之娶妻置產並置祭田數  
畝俾族人咸蒙義舉此烈丈夫事不意於巾幗中見之  
見年六十二歲

陳氏傳盤銘妻棗園頭人二十八歲夫故無子女欲以身殉因翁姑勸解留代奉養晝夜紡績艱苦備嘗姑歿已八年翁年七十有九煖酒溫茶始終不懈嘗言翁歿後仍伸殉夫之志見年五十歲

李氏才士俊妻盧各莊人三十歲夫故貧寡自守紡績度日見年五十八歲府尊游公獎曰勁節凌霜

王氏張承光妻榆關人二十四歲夫故無出撫一子一女相依事祖姑舅姑貞順安閒訓子女皆成立見年五十四歲

譚氏韓家林鄭文妻二十九歲夫故止遺二女不數年翁

歿兩叔不善治生產家中落氏與繼姑張氏各就食母家惟歲時聚晤而已守節三十年見年五十九歲

王氏張連魁妻楊家營人二十八歲夫故家貧翁老子準甫數歲翁諷其改適氏矢志彌堅紡績自給後子娶婦婦又卒子數年亦卒子身贅老見年七十一歲

楊氏望紫莊人傅家樹妻二十八歲夫故守節六十二年閨里無不服敬見年八十八歲

王氏儒童王昆妻洋河王家莊人二十九歲夫故撫孤錫祺遊邑庠見年六十歲光緒元年請旌

孟氏金錫勇妻樊葛莊人二十二歲夫故家貧無子近支



乏承繼者矢志自守見年五十八歲

王氏生員茹大和妻臺頭營人二十三歲夫故見年五十

六歲

楊氏李龍妻二十五歲夫故見年五十四歲

王氏胡國仲妻臺頭營人十九歲夫故撫姪春爲子見年

五十三歲

王氏溫志和妻臺頭營人二十九歲夫故撫孤成立見年

五十三歲

楊氏李璧妻曹東莊人於二十歲守節過堂姪李萬栢爲

嗣撫養成立見年五十九歲光緒元年請旌入祠

戴氏王錫慶妻東平市莊人十七歲守節隻影單形備嘗  
辛苦見年四十八歲

鹿氏彭璠妻邊儲屯化莊人二十五歲而寡子女皆無璠  
兄璋商於外其妻唐氏愿謹勤於織紉而短於治家事  
母教子一委鹿氏鹿極孝姑亦非鹿不歡嘗謂璋曰汝  
安心在外有汝弟婦吾無憂矣後璋與妻相繼死鹿竭  
力營姑喪葬撫三姪皆成立今年已七十其族孫廩生  
瑞雲欲爲請旌鹿止之曰吾德薄不堪恐折子孫福且  
爲人但修實行何必務虛名耶聞其言者皆遵之

汪氏青山口郭武妻年二十四歲夫故守節上奉孀姑子

方週歲見年五十五

于氏青山口趙榮妻二十八歲夫故守節子僅數歲撫之成立見年五十一

茹氏馬各莊張鳳彩妻二十二歲夫故守節撫孤成立見年七十一

蘇氏周松齡妻園子營人二十九歲夫故守節撫孤成立見年八十歲

楊氏麻古營周文友妻二十一歲守節子僅週歲撫養成立至三十八歲子亦故與孀媳孤孫形影相弔見年六十二

劉氏常兆蘭妻樊葛莊人二十二歲夫故見年五十三歲  
楊氏耶發繼妻富各莊人三十歲夫故撫前室遺孤成立  
見年五十歲

李氏史春妻楊家莊頭人十七歲歸春未百日而春以車  
輟死時翁姑痛子氏亦不欲生以叔嬸開導勉代子職  
翁與叔翁隨沒獨與嬸依勤苦持家見年五十歲

章氏張明達妻縣城人二十九歲夫故遺子鵬翰艱苦萬  
狀撫孤成立明達女兄適張玉田夫婦繼亡孤甥無依  
氏鞠養之今十餘歲矣甘貧無怨人以爲難

張丁氏南新莊人貢生丁青雲之妹邑庠生張霖蒼之子

彌也年二十六歲夫故遺二子俱在襁褓家貧守志  
自絕食以哺孤冬寒無衣被擁毳獨坐織紡恆終夜不  
寐如是者四十年今二孤成立俱有生業然氏已老矣  
見年六十五

安氏王復春妻年二十五歲夫故守節六十餘年見年八  
十六歲郡守游公賜匾曰節挺蒼松

孟氏細河鮑文啟妻香營人嘉慶十八年于歸時年十七  
歲未及三月夫外出身故守節四十三年未旌卒年六  
十歲

高氏庠生史安策妻臺營人二十八歲夫故撫孤子增貢

生史慶元成立卒年九十四歲計苦節六十六年光緒

元年 旌

補遺

翟氏生員王輔妻年三十歲夫故守節三十餘年匾 旌

貞節

陳氏生員茹春芳妻年二十七歲夫故撫遺孤長弼長翰

良佐如已出訓誨成立年八十六歲卒 旌

陳氏校尉楊鳳鳴妻年二十五歲夫故守節撫孤成立年

七十卒 旌

撫甯縣志卷十六

志餘

麻磚麻瓦相傳光武時物未見出何載籍縣境往往陷出  
古墓磚瓦皆此式豈長眠者多漢人耶

道光戊戌臺頭營民掘壕得柏槨昇數十根於外皆黃腸  
題湊也再下則橫木平排不知幾層縫中水上溢以細  
竹探之空洞而深究未見棺疑井穴也木歸城隍廟修  
工壕亦隨淤

石墨生石塘中狀如煙煤積滿石筒粗砂夾雜不堪入硯  
但染墨線用之其旁恆有焦木俗言老君煉山事雖似

不經理或有之

興福莊人家屋內地道旁行二里許不知盡境相傳通荷葉山道光初方塞之燕溝屯譚姓屋亦有穴與南井通爲避兵汲水計今井半穴口猶存宅售王氏舊跡湮矣古人藏身未免太拙

韓家林韓姓先世有文公奉祀生嘉慶朝猶襲禮房文卷具存也然撫甯舊無文公祠故學政全書載於昌黎

水雲寺讀蔡楊二碑記俱載王靈陽先生不犯欲塵抱道自重世傳爲真士先生家於所各莊少業儒長設教於水雲寺蔡挺負笈來從遂受業焉挺貴後薦之於朝屢



徵不起嘗語人曰妄心不死真心不見伏處巖壑終身不娶又精岐黃之術施藥濟人全活甚衆隱居數十年鄉人識與不識咸景仰其高云

演印字慶天大名府南樂縣人乾隆間因歲荒逃至撫甯其父鬻之無瑕峪爲僧年方十一歲自幼膂力過人技藝出衆其寺西亂石岡有毒蛇爲害往往傷寺中之羊牧豎據以告印印徒手往正值蛇盤澗底印舉石下擊未中蛇覺捕印印拔路旁合拱棗樹與鬬移時始能致斃肩負而回首尾拖地粗大於升嗣後每逢合睫卽見蛇來索命因邀匠人象木刻形繪畫置於佛堂供棹下

乃已至今寺中木蛇猶存寺距城南二十一里去馬家峪五里

同治十一年八月二十二日未刻天無片雲惟兔耳山陽陰雲數點霹靂一聲大雨如注南至馬家峪北至細河莊相去十餘里頃刻間平地水深丈許自西如堵而來漂去紙房等莊禾稼無數所幸水勢不常房屋未甚損壞

距城八里黃金山頭莊舊有石塘石上鳥跡劃然世傳丹鳳曾集於此匠人好事者將石扒去一層下面踪跡依然如故

印子寺在山阿中昔有雪仙鍊道於此鳴鐘說法虎來聽  
經雪仙尸解後此鐘不敢復鳴鳴則虎至

邑東北村名牛蹄寨因山出怪石形類牛蹄一鄉多不祥  
之事鄉人惡而埋之不數年怪石復見不祥如故乃於  
其地修觀音廟以鎮之將怪石埋之佛座下因以命寨  
鴨子峪山有青石形酷肖鴨腹背頭尾皆備旁有小石亦  
青色宛類鴨卵每逢陰雨輒聞鴨聲後移之村中遂不  
復鳴

縣治西南三十里許有官莊舊傳有女產一蛇如綫不忍  
棄潛以水蓄之漸有鱗甲逢雷雨亡去每陰雨之夜就

乳女卽氣絕去後復蘇女母苦之於就乳時潛擊以刃  
誤中其尾遂去不復來女方驚疑忽夢物告已曰吾已  
得所在北峪龍潭中矣卽邑志所載龍潭靈雨處也事  
近不經而至今官莊每逢歲旱祈雨裹糧赤足不憚險  
阻志云士民在此潭祈雨者水取雨隨然皆不若官莊  
之靈且應也相傳以爲外家之見私云

井在城東南二十里許井水常滿汲取不竭相傳爲唐  
太宗征東遺蹟莊因以名

昌黎城西北三十里有安山撫甯城西南五十里有七王  
山兩山南北相距二十里許父老相傳日出時安山見

城七王山見旂特無定期人不覺耳咸豐二年二月朔晨刻見南北二山雲霧迷離霞光耀目安山見城郭之像七王山見旗幟之形兩兩相照如海市蜃樓移時始散又七王山頂有平石二一敲之銅聲一敲之鐵聲人謂之銅鑼鐵鼓

撫甯城西南五十里翟坨莊東有山嶺名麪石壩壩內石色青白軟而滑碾細攪穀麪榆皮可食味淡無毒嘉慶十七年道光十三年米價昂貴窮民掘食活人無算但多食腹重耳